

6  
**LO MATREMMONIO**

**A FFORZA**

**FARZA DE MONZÙ MOLIERO**

**VOTATA A FFARDA**

**DA LO BARONE MICHELE ZEZZA.**

---

**NAPOLE**

**DA LI TRUOCCHIE DE LA SOCIATA' FREMMATECA.**

---

**1855.**



56014

## PERZONAGGE

D. ANIELLO, nnammorato de D. Chiarina.

D. CIOMMO, ammico de D. Aniello.

D. CHIARINA, figlia de D. Beneditto,

D. PEPPINO, frate de D. Chiarina.

D. BENEDITTO.

D. PANCRAZIO, filoseco aristoteleco,

D. MAMOZIO, filoseco pirronista,

MARIUCCIA zincara.

TATANELLA zincara.

*La scena se rappresenta miniezo  
a na cchiazza.*



SCENA PRIMMA

*D. Aniello , parlanno a no criato nfacce  
a la porta de la casa soia.*

Sette-panelle mmalorato , spilate  
Chesse recchie de ciuccio , e ssiente buono.  
Io vaco , e ttorno subbeto. Ntramente  
Tu arresedia la casa , e no mme fare  
A lo ssoleto tuio quarche dammaggio.  
Si vene bona ggente  
A pportarme denare ,  
Tu rumpete la noce de lo cuollo ,  
E da Don Ciommo vicneme a echiamunare :  
Si po assomma qua pittema cordiale ,  
P'asiggere cambiale ,  
Tu dille : Lo patrone è asciuto , e ddorme...  
No! dille : Lo patrone è asciuto , e ttorna  
Quanno de San Martino la campana  
Co cientomilia botte  
Dà lo nsignale de la meza notte.

SCENA SECONNA

*D. Ciommo , ch' ave ntiso sto trascurzo ,  
e Ddiuto.*

*D.C. ( Ssa mmasciata è da vero Macchiaviello. )*

*D.A. Oh chi veco! Don Ciommo, mm'è ccaduto  
Lo maccarone int' a lo ccaso: io t'aggio  
Da parlare sottile.*

*D.C. Che t' accorre?*

*D.A. Mme ronnea pe la capo no moschillo ;  
È mme voglio co ttico consigliare.*

*D.C. Don Aniè, tu me duommene a bacchetta,  
E sto ccà pe sservirte a barda, e a ssella.*

*D.A. Mettimmonce a sto pizzo ,  
E tt' arapo sto core; ma prommitteme  
De mme ddì pane pane, e bino vino.  
Lo sentemiento tuio.*

*D.C. Ccommenza a ddicere.*

*D.A. Mm'è benuta la mingria de nzorarme.*

*D.C. Vattenne; tu coffie?*

*D.A. Parlo addavero.*

*D.C. Quann'è cchesto, mprimisse, e nnantemonia  
Dimme...*

*D.A. Che buoie sapè ?*

*D.C. Quant'anne tiene.*

*D.A. Non tte pozzo servì, ca no lo ssaccio.*

Saccio mperò ca tengo na salute  
De toro bufalino.

*D.C.* E ttu no ssaie

L'aità che tiene?

*D.A.* Oh bella !

Comme fosse na scienza necessaria.

*D.C.* Mbè, respunneme a tuono.

Quanno nce canoscettemo a lo Muolo,  
Quant'anne avive?

*D.A.* Dicinnove, o vinte.

*D.C.* Pe quanto tiempo stettemo mpiagate  
Nzieme a Pezzulo?

*D.A.* Pe sett'anne.

*D.C.* E ddoppo  
Tu passaste a Ccaserta, e llà nce stiste?

*D.A.* Ott'anne.

*D.C.* Te mannaieno a Gaeta,  
Addò stiste...

*D.A.* Cinc'anne, e ssette mise.

*D.C.* Quanno tornaste?

*D.A.* Dudece anne arreto.

*D.C.* Me canosciste de vint'anne: stettemo  
A Pezzulo sett'anne,  
E ssongo vintisette: iste a Caserta  
P'ott'anne, e stammo a trentacinco: appriesso;  
Te spassaste a Gaeta pe cinc'anne,  
E assommano a quaranta *la taverna*.

Da dudece anne s'è tornato; e ssenza  
La fede de vatt'esimo tte dico

Ca so cinquantaduie belle, e ssonate.

*D.A.* Arrassosia! Gnernò! Don Ciommo mio,  
Piglie pizzc pe ttuornane.

*D.C.* Mmalora!

Ccà se tratta de somma, e non de gabbola  
De Bonafficiata. Io comm'ammico

A llettere de scatola tte dico,

Ca si no Don Liccardo giovenicello

S'ha da fare lo cunto co le deta,

Pe poterse nzorare,

Uno de l'aità nosta ha da pensare

Ca facenno le nnozzole,

Po le nnozzano ncanna. Leva suono,

E ccaccia sso penziero qua tentillo.

Si s'è stato nfì a mino bello, e ccoieto,

Siente l'ammico tuio, che non te nganna,

Non te mettere no sso chiappo ncanna.

*D.A.* Co cchella puca d'oro che me nguadio  
Sso chiappo n'è de cannevo,

Ma de zuccaro fatto da Barbato,

Che sta mmiezo Toletto.

*D.C.* Chi sapea tutto chesto? Mo te spiegho  
Comm' a libbro stracciato.

*D.A.* La fegliola

Ch'io voglio pe mmogliera

Pare na primmavera ; e l' ammo assale.

*D.C.* Le vuoie bene de core ?

*D.A.* Sissignore.

Già parlaie co lo patre ; e ppe stasera  
Li capitole fuorze se farranno.

*D.C.* Quann'è cchesto, m'attocca

De metterme da mo no punto mmocca.

*D.A.* Lassammo stà l'aità ; penzammo schitto

A la salute. Io so no merolillo ,

Smerzo Napole a ppede ,

E non nce spenno maie

Manco na cinco rana a lo vapore.

Tengo tutte li diente ,

Che bonno mazzecare fitto fitto :

Nè miedece , geruggeche ,

Varviere , e speciale

Ponno fà ncopp'a st' ossa capitale.

*D.C.* No nc'è peo ch' avè tuorto :

Nzorate priesto, Don Aniello mio.

*D.A.* È no sfizio vederte sempe rente

Na mogliera ammorosa , e na dozzana

De peccerille , che tte rassommegliano

Comm'a le sghizze d'acqua ,

E ntartaglianno chiammano *papà*.

*D.C.* Beneditto puozz' esse !

*D.A.* Me l'approuve ?

*D.C.* Ma comme !

- D.A.* Vero ammico!
- D.C.* E cchi te piglie?
- D.A.* Donna Chiarina.
- D.C.* Chella fegliolella,  
Che ha sempe terata a quatto spingole?
- D.A.* Gnorsì.
- D.C.* La figlia de Don Benedetto?
- D.A.* Nce aie nnevenato, signorsì.
- D.C.* La sora  
De no cierto... no cierto Don Peppino,  
Che fa lo guappo, e ffete d'esse acciso?
- D.A.* Iusto chesta. Don Ciò, tu che ne dice?
- D.C.* Dico, sposala craie.
- D.A.* Ma saccio scegliere?
- D.C.* Canchero! e ccomme!
- D.A.* Ammico, me consuele:  
Tu lo primmo sarraie de li mmitate.
- D.C.* Verraggio in abbigliè, co spata e bborza.  
Pe mmo t'aggio a llassare.
- D.A.* Statte buono, e ggovernate.
- D.C.* Bonnio.  
(Co chess'arucolella de semmenza  
Che te piglie pe sposa,  
Vuò stà frisco, compà, comm'a na rosa.)



SCENA TERZA

*D. Aniello solo.*

Quando se ngarra no niozio, è proprio  
No gusto de signore: tutte chille  
Che senteno da me sto matremmonio,  
Fanno lo pizzo a rrisa,  
Pocca non ponno metterce l' assisa.  
N' ommo de me cchiù sapio ed asciortato  
No nc'è, no nce sarrà, nè maie nc'è stato..

SCENA QUARTA

*D. Chiarina parlanno co la cammarera  
che porta appriesso, e Dditto.*

*D.C.* Iammoncenne, Rosè, iappeca iappeca.

*D.A.* (È addavero na luna nquintadecema.)

Non ve sia pe ccommanno, signorina,  
Zita futura de futuro zito,  
Addò iate?

*D.C.* Facenno spesolelle  
Da Monzù... da Monzù Chichirichì,  
Arrevato l' autr'iere da Parì.

*D.A.* È lo vero sì, o no, gioia d' Aniello,  
Ch'avrà la casa, anze la stalla mia

L'annore d'alloggiarve  
Vita vostra durante? Responnite,  
Ma responnite a buolo,  
Site contenta de sto *bis*, e *bolo*?

*D.C.* Io me zuco le ddeta p'allegrezza.  
Lo gnore m'ha tenuta, arrassosia,  
Nfì a mmo co quatto picde int'a na scarpa.  
Io, pe ffà zo che boglio, iev' ascianno  
E pe mmare, e pe tterra no marito.  
Vuie pe mme site stato  
N'acqua de Maggio.

*D.A.* (Nc'è mal'aria a Baia.)

*D.C.* Me potraggio spassare e nnotte, e ghiuorno  
A triate, a festine, a ghiuoco, a bballe;  
E mme voglio sfrenare nzine fine.

*D.A.* (Oh che mme sento scenne pe li rine!)

*D.C.* Comm'assomma Settembre,  
A Ppuortece iarrammo a belleggiare;  
E mme farrite comparè qua ddamma.

*D.A.* (Io me sento scolare a sdramma a sdramma.)

*D.C.* Maramè! Vuie ch'avite?

Ve site fatto nfacce ianco ianco.

*D.A.* Mm'è benuta na doglia int'a lo scianco.

*D.C.* Corre ssa malatia. Pe mmo penzate  
Schitto a sposà. Stateve buono: io vaco  
P'ordenà lo corriero a li mercante,  
A le mmodiste, scuffiare, ezzetera;

E ve manno le nnote pe ppavare ;

Nè ppenzate a docate cchiù , o meno.

*D. A.* ( Io mo me dolarrìa , si fosse prieno. )

## SCENA QUINTA

*D. Ciommo , e Dditto.*

*D. C.* Don Aniè , che piacere ch'aggio avuto

D'asciarle ancora ccà ! No gioicigliero

Ca tu spuse ha saputo ,

E bennerte vorria

L'aniello de la fede de brillante ,

Bello isso sulo , a bera concia ngrese.

Già te truove a ffà spese....

*D. A.*

Ammico mio ,

Io non vaco de pressa.

*D. C.*

Che ne vutte ?

Poco nnante pareva che bolive

Retto trammete corre da l' Aletto ,

Pe ffà l'atto cevile ?

*D. A.*

Mm'è benuto

Quarche scrupolo ncapo pe st' affare.

Voglio farne spiegà primmo no suonno

Ch'aggio fatto sta notte , e ffitto fitto

Peo de chiuovo mme percia lo cerviello.

Saie che li suonne songo

Comm' a spiecchie , e annevinano qua bota ,  
Zo , che po tte soccede.

Mme pare a de stà mmare nfacce a Nniseta,  
Ecco biento contrario ,  
Ienno la varca ad orza...

*D. C.* Pare no peccerillo : da sso suonno  
Caccia nummere cierte , e ghiocatelle.  
Ma pe lo matremmonio , puoie parlarne  
Co chille duie filoseche , che stanno  
De ccasa a tte becine : anze consigliale  
Uno pe bota , e ddoppo  
Te resuelve sì , o no de te nzorare.  
Io ntramente me spiccio quarche' affare.

SCENA SESTA

*D. Pancrazio parlanno a quarcuno  
dint' a la scena, e D. Aniello.*

*D. P.* E battenne a mmalora! Tu non saie  
Si sì bivo. Tte voglio fà a ccanoscere  
Co Arestotele mmano, ca sì ciuccio  
E ccauzato, e bestuto.

*D. A.* (Chist' arriva  
Iusto a ttiempo.)

*D. P.* Che bello selloggismo!  
La maggiore non bale quatto calle,  
La minore la cagne a ffave, e ccicere,  
La conseguenza tte la sbatte a ll' uocchie.

*D. A.* Don Pancrà, vuie ch' avite?

*D. P.* Oh, D. Aniello,  
Ve so schiavo. No cierto Pacchesicco  
Volea fà lo dottore; e mme deceva  
Ca lo cappiello ha forma, e non fegura;  
Mente la forma è schitto  
De le ccose anemate, e la fegura  
De chelle inanemate. Ed Aristotele  
Ste cose l' ha spiegate  
Dint' a lo libbro suio *De Qualitate*.

*D. A.* Vuie avite ragione, ma...

*D. P.* È na bestia?

**D.A.** Arcibestia.

**D.P.** Ciuccione ?

**D.A.** Co la sarma.

Ma lassammo mo stare le ffigure ,  
Le fforme , li cappielle , e le perucche ,  
E ssentite.

**D.P.** Ma vuie de quale lengua  
Ve servite , parlannome ?

**D.A.** De chella ,  
Che tengo mmocca. Vaco allengue mpriesteto?

**D.P.** Io ntенno lo lenguaggio, Grieco, Turco,  
Ngrese , Latino , Abbrejo , o Taliano ?

**D.A.** Niente de tutto zo ; Napolitano.

**D.P.** E mmèttiveve donca a umano manca ,  
Pocca co cchella recchia  
Sento parlare li lenguagge nuove ,  
E co la ritta chille vecchie , e addotte.

**D.A.** ( Ne' è porzì l' atechetta a lo ssentire ? )  
Io me vorria nzorà co na fegliola  
Bella essa sola ; ma vedенno a cierte  
Trascurze soie , ca nce sarriano guaie....

**D.P.** ( non danno recchie a D. A. )  
Co la parola l' ommo  
Li penziere tte spiega ; e li penziere  
Sò li ritratte de le ccose , comme  
Sò porzì le pparole li ritratte  
De li penziere. Chiste....

*D.A. ( Mettenno la mano nfacce a la vocca  
de D. P. )*

E cche mmalora ? S' è spilata Patria.

*D.P.* Chiste songo ritratte origgenale :

E cchi penza cchiù fino ,

Cchiù fino parla. Iate mo decenno.

*D.A. ( Vottanno D. P. dint' a la casa soia ,  
e nserranno la porta )*

Ca tte venga no canchero a la vocca !

*D.P. ( Affacciannose a la fenesta. )*

La parola ched è ? *Speculum animi.*

Donca armate sso specchio , e ddate fuoco.

*D.A.* Darria fuoco , ma vuie no mme facite  
Cchiacchiarià.

*D.P.* Sia lo trascurzo vuosto  
Laconeco , e zucuso.

*D.A.* Sissignore.

*D.P.* Senza cchille vocabbole antequate.

*D.A. ( Piglianno doie vrecce da terra. )*  
Mo te sciacco a mmalora.

*D.P.* V'arraggiate ?

Donca site cchiù ntontaro de chillo

Pacchesicco sciaddeo de la fegura ,

E fforma de cappiello. Io so dottore

*Utroque jure.* Saccio la rettoreca...

*D.A.* E battenne !

*D.P.* La storia , la grammateca..

*D.A.* Statte zitto !

*D.P.* La fiseca , la nauteca ,  
L'astronommia , la medecina , la...

*D.A.* Trasetenne , o mmo votto  
La porta nterra.

*D.P.* Ciuccio-bestia *ut octo.*

### SCENA SETTEMA.

*D. Aniello sulo.*

Mannà li vische suoie !

A parlà sempe , e a no ssentire maie ?

Mme deceva lo masto , ch' Arestotele

Era no chiacchiarone ;

E tte caccia sse sciorte de scolare.

Iammo a pparlare a ll' autro ;

Non fosse tanto pazzo , e mme facesse

Mettere nquarche siesto sso niozio.

Tuppe tuppe ; nce stesse Don Mamozio ?



SCENA OTTAVA

*D. Mamozio e Dditto.*

*D.M.* Oh Don Aniello, che v' accorre?

*D.A.* Io songo

Venuto ccà p' avere no consiglio.

(Buono! Ss'ammico fa parlà la ggente.)

*D.M.* Scusate, mio signore; avite a ddicere:

Mme pare schitto d'essere venuto,

E non già so benuto, pocca è dubbio.

*D.A.* Mme pare? Io so benuto ncarne, ed ossa.

*D.M.* Che conseguenza è cchesta?

*D.A.* E n'è lo vero,

Ch'io sò benuto, e buie chiacchiariate?

*D.M.* Mme pare de vederve, e de sentirve,

E mme pare ch'io stia chiacchiarianno;

Ma lo ddico pe ccerto?

*D.A.* Fosse certo accossì no ternicciullo.

Lassammo sti *mme pare*, e no *mme pare*,

È pparlammo d'affare.

Vorria nzorarme.

*D.M.* Non ne ssaccio niente.

*D.A.* E pperzò ve lo ddico.

*D.M.* Pò soccedere.

*D.A.* La zita è giovenella, e bella assaie.

*D.M.* Chessa cosa non è ntra le mpossibbele.

*D.A.* Faccio bene a sposarla, o faccio male?

*D.M.* L' uno, o l' altro ; a barrata de cecato.

*D.A.* ( Bella museca nova ! ) Io v' addimmanno,  
Si faccio bene , o male a la sposare.

*D.M.* La rennetta de Massa

E ccomme quaglia passa.

*D.A.* Lo patre nce acconsente.

*D.M.* Me consolo.

*D.A.* Ma si fusseve a mme, vuie che farrisseve?

*D.M.* E cchi lo sape?

*D.A.* Che mme consigliate?

*D.M.* Chello che ve garbizza.

*D.A.* Io crepo, e sbotto.

*D.M.* Me ne lavo le mmane.

*D.A.* ( *Vattennolo* ) Ed io v' acconcio

Pe le ffeste, filoseco mmardato.

*D.M.* Ah! Ah! Vuie site pazzo

Da lo spetale asciuto?

*D.A.* Io no ssaccio si v'aggio, o no, vattuto.

*D.M.* Ve faccio na quarera cremmenale.

*D.A.* Me consolo.

*D.M.* Mm' avite fatto nfacce

No vruognolo mmarditto.

*D.A.* E cchi lo ssape?

*D.M.* Iarraggio, parlarraggio, e be farraggio....

*D.A.* Me ne llavo le mmane.

*D.M.* Ve farraggio...

*D.A.* Chello, che ve garbizza.

*D.M.* Ve farraggio

Mparare la crianza. V'è piaciuto

Ncopp' a le spalle meie la mazza auzare?

*D.A.* La mazza auzà? Mme pare, e no mme pare.

### SCENA NONA.

*D. Aniello sulo.*

Che mmalora! Sso ciuccio dubbetava

Porzì si mme pparlava, o non parlava.

E rresto sempe a ccoppa.

Addò sbatto de capo,

Pe ssapere si m'aggio da nzorare?

Paro no pollecino int'a la stoppa.

Iusto iusto mo assommano doie zincare :

Fosse pe mme fortuna,

De farne annevenare la ventura?

SCENA DECIMA

*Mariuccia , Tatanella , e Dditto.*

*M.* Lo treppete , e lo spito.

*T.* Bona ggente , sta ccà la zincarella.

*D.A.* Venite ccà : sapite nuevenare

La ventura a cciammiello ?

*M.* Sissignore.

*T.* Ma comme ! Vasta schitto che nce auzate

Ll'uccchie nfacce.

*M.* Ma fitte , e ssenza sbatterle.

*D.A.* Veccole ccà.

*M.* La mutria pare bona.

*T.* Mutria che dice , e cche promnette assaie.

*M.* Fuorze te sposarraie.

*T.* Ma co qua nenna !

*M.* Allegra , acconcia , cianciosella , e bella.

*D.A.* Tutto chesto va buono , ma sarraggio

No marito asciortato , o desperato

Dì immesurare no barcone , o puro....

*M.* No barcone ?

*D.A.* Gnorsine.

*T.* Na fenesta ?

*D.A.* O fenesta , o barcone , astreco , loggia ,

La Mmalora de Chiaia , che ve gliotta !

*M.* Comme site pastuso , bene mio !

*D.A.* Me nzoro, o non me nzoro?

*T.* Quant'è ccaro!

Se nzora, o non se nzora?

*D.A.* Eh iatevenne,

Fattucchiare mpechere.....

*M.* Comme strilla?

Zito, e non zito mio,

Nuie nce ne iammo sa? Bonni.

*T.* Bonnio.

## SCENA UNNECEMA

*D. Aniello sulo.*

Eh squagliate a ddeciavolo!

Me chiantano accossì comm'a no cavolo,

Senza dirmene nè aseno, nè bestia?

Ma chi veco? È la zita: m'annasconno.

Se ne vene parlanno sola sola:

Sentimmo che bò dicere;

E, ssi accorre, la manno a benedicere.

SCENA DUDECESEMA

*D. Chiarina, e D-litto annascuso.*

*D.C.* Io passarria pe ppazza de catena ,  
Si pe ggenio sposasse Don Aniello :  
Ma quanno sposo li denare suoie ,  
Faccio no buon' accatteto.  
E ppo, spero che crepa quanto primmo,  
E mme levo sso lotano da cuollo.  
Quant' ato pò campà? seie , sette mise?  
Tanno addevento vedola,  
E cco chille felusse , che mme resta  
Ne voglio fare festa! E cche guaglione  
Pe ssecunno marito.... Oh! Don Aniello ,  
Vuie state ccà? Mo proprio ntra me stessa  
Io parlava de vuie , comme commene  
A na zita che tanto ve vo bene.

*D.A.* Dormo a quatto coscine ;  
Saccio lo core vuosto.

*D.C.* E mme rennite  
Iostizia , ca la mmereto.

*D.A.* ( Oh che facce! )

*D.C.* Io ve lasso , ca vaco a bisettare  
Reto a sto vico ccà quatto commare.

SCENA DECEMATERZA

*D. Aniello sulo.*

Lo tiempo non bò tiempo.  
Primmo ch'assomma ssa tropea d'Agusto,  
Voglio piglià palazzo.  
Me ne vao pazzo pazzo a ffà capace  
Lo *quonnam* suocro mio Don Beneditto,  
De sciogliere ss'affare....  
Oh canchero! mme pare  
Ca mo scenne le scale. Anemo, e ccore.  
Penzo a la pace mia, non già a l'ammore.

SCENA DECEMAQUARTA

*D. Beneditto, e Dditto.*

*D.B.* Oh Don Aniello, iennero futuro,  
E cche annure so chiste?  
*D.A.* È mmio l'annore.  
*D.B.* V'aggio ntiso. Venite ccà pe stregnere  
Lo matremmonio?  
*D.A.* Vengo...  
*D.B.* Pe st'affare,  
Si vuie contate l'ore,  
Io conto li minute.

*D.A.* Io vengo a ddicere....

*D.B.* Saccio tutto: So lleste già li musece  
Pe la festa.

*D.A.* Va bene ( anze va male )  
Ma...

*D.B.* Gnorsì , già parlaie  
Co lo notaro , e iodece-a-ccontratte  
Pe stenne li capitole , e ssò fatte.

*D.A.* V'aggio a pparlare d'autro.

*D.B.* Favorite  
Ncopp'a la casa , e llà parlammo.

*D.A.* È mmeglio  
Parlà ccà mmiezo.

*D.B.* Che v' accorre? Veccome.

*D.A.* L'ommo sole proponere  
E lo Cielo desponere. Co mmico  
Che songo attempatiello  
Saria nfelice la fegliola vosta.

*D.B.* Scusateme : Chiarina  
V'ha visto , ed è ccontenta.

*D.A.* È bontà soia; non sape , poverella ,  
Lo carattere mio ccossì fratuso.

*D.B.* Chella è na gioia , che s'adatta a tutto.

*D.A.* Stutammo sto locigno. Io ve consiglio  
Pe bene suio ( zoè pe bene mio )  
De non darmela.

*D.B.* E immanco io galantommo



A la parola data?

*D.A.* Io ve ne dongo

Tutte le ffacortà.

*D.B.* La sposarrite

A despietto de l'ate pretenniente.

*D.A.* ( Comm'è ccoccioso. )

*D.B.* Si mo ccà venesse

No prencepe a ccercarla , io le derria :

Don Aniello è lo zito , e ttanto avasta.

*D.A.* Io me veco confuso

Pe ttanta stimma , ed ammecizia vosta ;

Ma non boglio nzorarme.

*D.B.* E la raggione ?

*D.A.* Non ha raggione Ammore ,

E ssi raggione ntenne ,

Ammore cchiù non è.

*D.B.* Quanno po Metastasio muorto e buono

M'è benuto a zucà co ssa sentenza ,

Ve dico ch'io non piglio

No galantommo co la funa ncanna ,

Pe ffarlo nguadià. Voglio refrettere

Zo che s'ave da fà. Mo saglio ncoppa ,

Chiammo consiglio-de-famiglia , e ssubbeto

Co ccommune piacere

Ve farraggio lo quatenò sapere.

SCENA DECIMAQUINTA

*D. Aniello sulo.*

Si m'è porto sta poglia,  
La faccio a buon mercato.  
Che beneditto sia Don Benedetto,  
Che s'è ffatto capace de scassare  
Chisse vere capitole de Zeza...  
Zitto, zì! Se ne vene mo lo figlio;  
Fuorze mme porta la risposta, e ghiusto  
Ccà de facce me trova.  
Pare l'auciello de la bona nova.

SCENA DECIMASESTA

*D. Peppino co doie spate mmano,  
e Dditto.*

*D.P.* Oh! signor Don Aniello,  
Io ve so schiavottiello.  
*D.A.* Chest'è livrea de no criato vuosto.  
*D.P.* Papà m'ha ditto, ed io me so nchiatrato,  
Ca vuie, penzanno meglio,  
Non bolite cchiù a ssorema.  
*D.A.* . . . . . È lo vero:  
Ma co ppena la lasso.  
*D.P.* . . . . . No nc'è mmale:

Sò cose, che soccedeno a lo munno.

*D.A.* Io proprio ne sto affritto.

*D.P.* Chest'è niente è tutt' uno.

*D.A.* Io v' assecuro....

*D.P.* (*Presentanno doie spate a D. Aniello.*)

Aggiate la bontà, Si Don Aniello,

De scegliere na spata a ggenio vuosto

Ntra ste doie. Favorite.

*D.A.* A qua proposeto?

*D.P.* Vuie mme nzegnate, mo nce vo, qua masto,

Ca non bolenno cchiù sposare a ssorema,

Nce avete dato no schiaffone.

*D.A.* E ccomme?

*D.P.* Quarch' ato frate avria

Mannata na notifecca, e pparlato

Co ppagliette, e scrivane: io non song'ommo

De fracasse, nè baco co lo tristo.

Ve dico, ma co tutta la crianza,

De sperciarce la panza

Co st' allicca-sapune.

*D.A.* Oh vè che mmuto?

*D.P.* Levammo le ppazzie,

Non perdimmo cchiù tempo.

*D.A.* Ammico mio,

Sta panza vo porpette, e mmaccarune,

Non allicca-sapune.

*D.P.* Si volite,

Io derria de spicciarce.

*D.A.* Si credite,

Io derria non penzarce.

*D.P.* Io tengo affare,

Non pozzo perde tempo.

*D.A.* E ghiatevenne.

*D.P.* Si non facimmo primmo

Lo doviello.

*D.A.* Doviello?

*D.P.* E ggìa, se ntenne.

*D.A.* Guamamma è mmorta, e non pò fà cchiù  
figlie.

*D.P.* ( *Vattennolo co la spata* )

Quann'è cchesto, scusate, s'io ve dongo

Doie chiattonate *comm'i fo*.

*D.A.* Va chiano.

*D.P.* È na pena pe mme dovere a fforza

A no vecchio nzegnà lo Galateo.

Vuie cercasteve sorema : de botta

Non la volite cchiù : vengo a mmitarve

A no doviello, e scemiate... E ccomme

Mme potete dà tuorto, s'io ve vatto,

Vuie che de ste materie state ntiso,

E ppotite stamparne?

*D.A.* (Vi che mpiso?)

*D.P.* Via mo; non ve facite cchiù pregare.

*D.A.* E mmo tornammo a ccoppa?

*D. P.* Ammico caro,

Io no ntenno obbrekarve ; ntenno schitto

Ca sposate , o facite lo doviello.

*D. A.* Io non pozzo servirve nè pe l' uno ,

Nè pe l' ato commanno.

*D. P.* Ve ncocciate ?

*D. A.* Me ncoccio.

*D. P.* ( *vattennolo* ) Perdonate, s' io ve repreco

Chella ricetta de le cchiattonate.

*D. A.* Va chià ! Mmalora cioncalo !

*D. P.* Io m' affriggo,

Dovenneve trattà de sta manera ;

Ma si vuie non facite

Lo doviello , o sposate

Io ve secoto a ddare chiattonate ;

E spero co ste botte.....

*D. A.* Quann'è cchesto , mo sposo , e bona notte.

*D. P.* Eh dateme no vaso a ppezzechille ,

Ammicone de st' arma ! Io me consolo

Vedenneve capace de raggione.

Co le belle parole ntra de nuie

Avimmo sistemato st' affaruccio.

Vuie , Don Aniello mio , iate pe mmille.

Via mo ; n' ato vasillo a ppezzechille.

SCENA URTEMA

*D. Benedetto , D. Ciommo , D. Chiarina ,  
D. Mamozio , D. Pancrazio , e dditte.*

*D.P.* Papà, bone notizie: Don Aniello  
È aggarbato, e ppolito; e da se stisso  
S'è puosto a la raggione, e bò sposare.

*D.C.* Io, comm' ammico, faccio lo compare  
A ste nozzole.

*D.C.* O zito bello mio,  
Non penzà: ccà stongh'io,  
Pe pportarte spassanno.

*D.M.* Mio signor Don Alesio,  
Mme pare, e no mme pare  
Doverme consolare  
De chisso matremmonio.

*D.P.* Statte zitto,  
Don Mamozio! Che cànchero ne vutte?  
Aie da ddì, lo futuro sposalizio,  
Pocca Donna Chiarina, e Don Alesio  
Songo future spuse.

*D.B.* Chiste songo  
Li vere matremmonie fatte a ggenio,  
Senza mette pe mmiezo li pagliette.....  
Don Anìè vuie parite  
Na statola de ligno? Non rerite,